

Federalna agencija za upravljanje oduzetom imovinom (u daljem tekstu: Agencija) koju zastupa Emir Bašić, v.d. direktora i

Sudska policija u Federaciji Bosne i Hercegovine (u daljem tekstu: Sudska policija) koju zastupa Dženad Grošo, direktor, zaključili su

S P O R A Z U M

o saradnji Federalne agencije za upravljanje oduzetom imovinom i Sudske policije u Federaciji Bosne i Hercegovine

I OPŠTE ODREDBE

Član 1.

Ovaj Sporazum o saradnji (u daljem tekstu: Sporazum) se zaključuje sa ciljem stvaranja potrebnih preuvjeta za izvršenje sudskih odluka vezanih za oduzimanje imovinske koristi u smislu odredbi Zakona o oduzimanju nezakonito stečene imovine krivičnim djelom ("Službene novine Federacije BiH", broj 71/14) (u daljem tekstu: Zakon o oduzimanju nezakonito stečene imovine krivičnim djelom), odnosno uspostavljanja efikasnije međusobne saradnje Agencije i Sudske policije iz drugih zakonom utvrđenih nadležnosti Agencije i Sudske policije.

Član 2.

Potpisnici su saglasni da se ovim Sporazumom definišu načela, nadležnosti, područja operativne saradnje, edukacija i analiza pravnog okvira, nositelji poslova saradnje i druga pitanja od značaja za efikasnu međusobnu saradnju Agencije i Sudske policije u skladu sa nadležnostima proisteklih iz zakonskih i podzakonskih propisa.

Član 3.

Ovim Sporazumom se određuju osnove saradnje, uloge, obaveze i odgovornosti potpisnika ostavljajući mogućnost da se kasnije dodatno, preciznije i detaljnije utvrđuje njegov sadržaj ili pojedini dijelovi sadržaja.

II NAČELA

Član 4.

Agencija i Sudska policija su saglasne da će sarađivati u svim zajedničkim aktivnostima i da će poslove u okvirima svojih nadležnosti izvršavati u cilju efikasnog izvršenja sudskih odluka vezanih za oduzimanje nezakonito stečene imovine krivičnim djelom poštujući načela javnosti, efikasnosti, stručnosti, odgovornosti i ekonomičnosti.

III NADLEŽNOSTI

Član 5.

(1) Agencija je članom 30. Zakona o oduzimanju nezakonito stečene imovine krivičnim djelom nadležna za upravljanje privremeno i trajno oduzetom imovinom, provođenje analiza u području oduzimanja imovinske koristi pribavljene krivičnim

djelom, stručnu edukaciju iz područja finansijskih istraga i oduzimanja imovinske koristi pribavljene krivičnim djelom, kao i obavljanje i drugih poslova propisanih ovim zakonom.

- (2) Sudska policija je u smislu odredbi Zakona o sudskoj policiji u Federaciji Bosne i Hercegovine („Službene novine Federacije BiH“, broj 77/20), Zakona o pravilima postupka i odredbi Pravilnika o načinu vršenja poslova i primjeni ovlaštenja Sudske policije u Federaciji Bosne i Hercegovine („Službene novine Federacije BiH“, broj 25/21), nadležna za prikupljanje informacija, dovođenje osumnjičenih, optuženih osoba, svjedoka i vještaka, lišenje slobode osuđenih osoba i osoba kojima je određena mjera pritvora, sprovođenje osoba lišenih slobode, zadržavanje osoba lišenih slobode, provođenje sudskih odluka, fizičku i tehničku zaštitu nosilaca pravosudnih funkcija, njihove imovine i članova uže porodice, zaštitu i izvršavanje drugih naloga pravosudnih institucija kojim se osigurava uspješno vođenje odgovarajućeg postupka.

IV PODRUČJA OPERATIVNE SARADNJE

1. Osiguranje imovinske koristi privremenom mjerom

Član 6.

- (1) Sudska policija u skladu sa rješenjem ili naredbom suda kojim je izvršenje rješenja o određivanju privremenih mjera kojim se određuje osiguranje oduzimanja imovinske koristi povjereno Agenciji, pruža pomoć u provođenju sudskih odluka (u daljem tekstu: asistencija) Agenciji, kojom prilikom stvara potrebne sigurnosne uslove za nesmetano provođenje sudske odluke i sigurnost učesnika u postupku izvršenja.
- (2) Izuzetno od stava (1) ovog člana, Sudska policija će u skladu sa rješenjem ili naredbom suda neposredno provesti sudsku odluku u postupku oduzimanja nezakonito stečene imovine krivičnim djelom u slučajevima provedbe rješenja o osiguranju privremenom mjerom donesenom u skladu sa odredbama člana 17. Zakona o oduzimanju nezakonito stečene imovine krivičnim djelom.
- (3) Aktivnosti iz stava (2) ovog člana se smatraju hitnim, a podrazumijevaju pronalazak imovine koja se treba oduzeti, utvrđivanje identičnosti pronađene imovine sa imovinom naznačenoj u rješenju ili naredbi za oduzimanje, stavljanje pod kontrolu pronađene imovine, oduzimanje imovine uz izdavanje potvrde o oduzimanju i predaju oduzete imovine Agenciji na čuvanje ili upravljanje.
- (4) Pokretnu imovinu oduzetu na način iz stava (2) ovog člana, Sudska policija će predati Agenciji na licu mjesta. Kada to sigurnosni uslovi zahtjevaju na pismeni zahtjev Agencije, Sudska policija može pružiti asistenciju Agenciji u smislu obezbjeđenja sigurnosnog ambijenta od momenta predaje oduzete imovine Agenciji do momenta deponovanja na sigurnu lokaciju koju odredi Agencija, u skladu sa članom 25. stav (4) Zakona o oduzimanju nezakonito stečene imovine krivičnim djelom.
- (5) U svrhu obezbjeđenja sigurnosnog ambijenta i efiksnog izvršenja sudske odluke vezano za oduzimanje nezakonito stečene imovine krivičnim djelom, Sudska policija će vršiti procjenu stepena složenosti u svakom konkretnom slučaju.
- (6) Aktivnosti iz stava (1) i (2) ovog člana se prethodno koordiniraju između Sektora za operativne poslove i koordinaciju Sudske policije i Sektora za preuzimanje i upravljanje oduzetom imovinom Agencije u svakom konkretnom slučaju.

2. Izvršenje presude

Član 7.

- (1) Sudska policija se obavezuje da će u slučaju kada je izvršenje sudske odluke u skladu sa članom 24. stav (4) Zakona o oduzimanju nezakonito stečene imovine krivičnim djelom povjereno Agenciji, na osnovu naredbe ili zahtjeva nadležnog suda za pružanje asistencije, a shodno procjeni stepena složenosti operativne aktivnosti, te raspoloživim personalnim i materijalno tehničkim kapacitetima, Agenciji pružiti potrebnu pomoć kako bi se osiguralo sigurno i efikasno izvršenje sudske odluke vezano za trajno oduzimanje nezakonito stečene imovine krivičnim djelom.
- (2) Pomoć iz stava (1) ovog člana podrazumjeva poduzimanje mjera i radnji od strane službenika Sudske policije u obimu i na način uređen podzakonskim aktima Sudske policije kojim je propisana procedura postupanja Sudske policije prilikom pružanja asistencije sudu.
- (3) Agencija se obavezuje da će u slučajevima kada joj je povjereno provođenje izvršenja sudske odluke vezane za trajno oduzimanje nezakonito stečene imovine krivičnim djelom, Sudskoj policiji pružiti raspoložive informacije potrebne za provođenje procjene stepena složenosti operativne aktivnosti u složenijim slučajevima najmanje sedam dana prije zakazanog termina provođenja sudske odluke, a u manje složenim slučajevima najmanje tri dana prije zakazanog termina provođenja sudske odluke kako bi se usaglasilo zajedničko djelovanje koje za cilj ima sigurno i efikasno izvršenje sudske odluke vezano za oduzimanje nezakonito stečene imovine krivičnim djelom.

3. Angažovanje drugih učesnika

Član 8.

- (1) Ukoliko se u postupku provođenja sudskih odluka iz člana 6. i 7. ovog sporazuma, prilikom provođenja sigurnosne procjene ukaže potreba za angažovanjem ljudskih resursa i materijalno-tehničkih sredstava (medicinska služba, vatrogasna služba, veterinarska služba, vučna služba, specijalizovane institucije, privredni subjekti, stručna lica, bravar, električar i sl.) sa kojim ne raspolaže Sudska policija, odnosno izvršenje radnji koje nisu u nadležnosti Sudske policije, isti će pismenim putem zahtijevati od Agencije osiguranje kapaciteta neophodnih za provođenje sudske odluke. U slučaju hitnosti Sudska policija može usmenim putem zahtijevati od Agencije obezbjeđenje naprijed navedenih resursa i sredstava, a takav zahtjev će službenici Agencije evidentirati u zapisniku o preuzimanju imovine.
- (2) Izuzetno od stava (1) ovog člana, ukoliko Agencija nije u mogućnosti osigurati angažovanje fizičkih i pravnih lica ili materijalno-tehničkih sredstava neophodnih za provođenje sudske odluke uputit će pismeni zahtjev pravosudnoj instituciji odnosno sudu za angažovanje potrebnih resursa.

4. Razmjena informacija

Član 9.

Agencija i Sudska policija se obavezuju da će sve informacije sa kojima raspolažu, a u cilju procjene stepena složenosti za postupanje i izvršenje sudske odluke blagovremeno razmjenjivati.

V EDUKACIJA I ANALIZA PRAVNOG OKVIRA

Član 10.

- (1) Agencija se obavezuje da će u okviru izvršenja poslova iz člana 30. stav (1) tačka c) Zakona o oduzimanju nezakonito stečene imovine krivičnim djelom u stručne edukacije na temu oduzimanja imovinske koristi pribavljene krivičnim djelom uključivati službenike Sudske policije.
- (2) Agencija i Sudska policija će angažovanje edukatora i učesnika edukacija vršiti međusobnim dogovorom za svaku pojedinu edukaciju.
- (3) Agencija i Sudska policija se obavezuju da će po potrebi vršiti analizu pravnog okvira i drugih pitanja vezanih za realizacije sudskih odluka o oduzimanju nezakonito stečene imovine, te će kod nadležnih organa zakonodavne, izvršne i sudske vlasti ili drugih relevantnih tijela inicirati izmjene i dopune zakonskih i podzakonskih propisa i rješavanje drugih pitanja potrebnih za efikasnu realizaciju sudskih odluka o oduzimanju nezakonito stečene imovine.

VI NOSITELJ POSLOVA SARADNJE

Član 11.

Nositelj poslova saradnje će se organizovati na nivou Agencije i Sudske policije, odnosno organizacionih jedinica u okvirima istih.

VII ZAVRŠNE ODREDBE

Član 12.

Ovaj sporazum je potpisan u četiri istovjetna primjerka od kojih svaka strana zadržava po dva primjerka.

Član 13.

Stupanjem na snagu ovog sporazuma prestaje da važi Sporazum o saradnji Federalne agencije za upravljanje oduzetom imovinom i Sudske policije Federacije Bosne i Hercegovine, broj 01-06-278-1/16 i Sp-01-2057-3/16 od 26.01.2017. godine.

Član 14.

Ovaj sporazum stupa na snagu danom potpisivanja.

POTPISNICI SPORAZUMA:

Federalna agencija za
upravljanje oduzetom imovinom
v.d. DIREKTOR
Emir Basić

Sudska policija u Federaciji BiH
DIREKTOR
Dženad Grošo, mr. iur.

Broj: 01-02-3-618/24
Dana, 03.07.2024. godine

Broj. Sp-01-02-1784/24
Dana, 03.07.2024. godine